

# CABINET CYNGOR GWYNEDD

## Adroddiad i gyfarfod Cabinet Cyngor Gwynedd

<b>Dyddiad:</b>	5ed o Fedi 2017
<b>Teitl yr Eitem:</b>	Adroddiad Perfformiad Aelod Cabinet Amgylchedd
<b>Pwrpas:</b>	Derbyn a nodi'r wybodaeth yn yr adroddiad
<b>Aelod Cabinet:</b>	Y Cyngorydd Dafydd Meurig
<b>Swyddog Cyswllt:</b>	Dilwyn Williams, Prif Weithredwr

### 1 CYFLWYNIAD

- 1.1 Pwrpas yr adroddiad yma yw diweddarau fy nghyd aelodau ar yr hyn sydd wedi digwydd yn y meysydd yr wyf yn gyfrifol amdanynt fel Aelod Cabinet Amgylchedd. Bydd hyn yn cynnwys amlinellu'r hyn sydd wedi digwydd yn erbyn addewidion y Cynllun Strategol; lle mae'r mesurau perfformiad arni; a'r diweddaraf o ran cynlluniau arbedion a thoriadau.
- 1.2 Yr unig addewidion sy'n berthnasol i'r Cynllun Strategol yw'r cynlluniau arbedion ac mae yna ddiweddariad ar y rhain yn rhan 5.
- 1.3 Byddwn yn eich hatgoffa fod yr holl faterion eisoes wedi bod yn destun trafodaeth ac wedi eu craffu mewn cyfarfodydd o'r Tim Rheoli sydd hefyd yn cynnwys 2 gynrychiolydd o'r Pwyllgor Craffu perthnasol.
- 1.4 Ar y cyfan, rwy'n hapus gyda perfformiad y mesurau yr wyf yn gyfrifol amdanynt neu fod camau priodol wedi eu cymryd er mwyn gwella perfformiad.

**Cyswllt:**  
01286 679868  
01286 679490

[cabinet@gwynedd.llyw.cymru](mailto:cabinet@gwynedd.llyw.cymru)



## 2 Y PENDERFYNIAD A GEISIR

2.1 Derbyn a nodi'r wybodaeth yn yr adroddiad

## 3 Y RHESWM DROS YR ANGEN AM BENDERFYNIAD

3.1 Er mwyn sicrhau rheoli perfformiad effeithiol.

## 4. PERFFORMIAD

4.1 Mae **Afodiad 1** yn adrodd ar y mesurau perfformiad sy'n gysylltiedig â fy mhortffolio. Rwy'n croesawu'r ffaith fod graffiau yn cael eu defnyddio i adrodd ar nifer o'r mesurau erbyn hyn gan gyflwyno'r wybodaeth mewn ffordd ddealladwy a gweledol.

4.2 Mae'r **Gwasanaeth Eiddo** yn gyfrifol am gefnogi Adrannau'r Cyngor drwy ddarparu eiddo addas ar gyfer cyflwyno gwasanaethau a sicrhau fod portffolio eiddo'r Cyngor yn cael ei reoli'n effeithlon ac effeithiol.

4.2.1 Erbyn hyn fe welir fod y data ar gyfer **Canran adeiladau gyda systemau diogelwch priodol mewn lle (Eiddo 4)** wedi sefydlu gyda perfformiad yn 94% o'i gymharu a 90% yn y ddau gyfnod adrodd diwethaf ac 75% a 70% yn y ddau gyfnod cyntaf yn 2016/17. Rwyf wedi derbyn eglurhad pam nad yw'r perfformiad yn 100% ac wedi gofyn am restr o'r safleoedd sydd heb systemau yn eu lle ynghyd a'r hyn y bwriedir ei wneud er mwyn ymateb erbyn y cyfarfod herio perfformiad nesaf.

4.2.2 Nodir fod y dull o gasglu'r wybodaeth ar gyfer **Canran Bodlonrwydd Cwsmeriaid Uned Diogelwch a Gwaith Rhaglenedig (Eiddo5)** wedi newid gan olygu fod angen i'r cwsmeriaid roi rheswm os nad ydynt yn rhoi sgôr o 10. O ganlyniad, er bod y perfformiad yn ymddangos fel ei fod wedi dirywio mae mwy o sylwadau adeiladol wedi eu derbyn fydd yn galluogi'r Uned i roi camau yn eu lle i wella perfformiad.

4.2.3 Gwelir fod y **Nifer o apeliadau i'r beirniad anibynol sy'n cael eu caniatáu (Eiddo11)** wedi lleihau dros y 2 flynedd diwethaf ac nad oedd unrhyw apeliadau yn y cyfnod diwethaf na'r un blaenorol. Mae'r mesur wedi galluogi'r Uned Parcio i adnabod y rhesymau dros yr apeliadau ac i roi camau yn eu lle er mwyn ymateb iddynt ac adlewyrchir hyn yn y lleihad yn y niferoedd.

4.2.4 Mae'r Uned Stadau a Chyfleusterau wedi bod yn adolygu eu pwrpasau a'u mesurau er mwyn sicrhau eu bod yn gyfredol a byddaf yn adrodd arnynt yn fy adroddiad perfformiad nesaf.

4.3 Mae'r **Gwasanaeth Trafnidiaeth Integredig** yn ei gyfanrwydd yn hwyluso gallu pobl i drafailio o un lle i'r llall ar draws rhwydwaith sy'n ddiogel gan hefyd godi eu hymwybyddiaeth a'u haddysgu am ddiogelwch.

4.3.1 Nodir y bu cynnydd yn y **Nifer o gwynion a dderbyniwyd am wasanaethau cludiant cyhoeddus dan gcontract i'r Cyngor (Cludiant 2)** o 4 yn y cyfnod adrodd diwethaf i 8. Yn yr un modd bu cynnydd yn y **Nifer o gwynion a dderbyniwyd am wasanaethau cludiant cyhoeddus masnachol eu natur (Cludiant 3)** o 8 i 19. Rwyf wedi herio perfformiad y mesurau hyn ac wedi derbyn eglurhad ynghylch y

materion oedd wedi codi ac yn hapus fod camau priodol wedi eu cymryd er mwyn ymateb.

- 4.3.2 Fodd bynnag, daeth yn amlwg fod y ffigyrau yn cynnwys ymholiadau yn ogystal a chwynion ac i'r dyfodol rwyf wedi gofyn iddynt adrodd ar y cwynion yn unig a sut y maent wedi ymateb iddynt.
- 4.3.3 Nodir fod gwaith yn mynd rhagddo yn yr Uned Gwaith Stryd a'r Uned Cefn Gwlad i ddatblygu mesurau addas a byddaf yn adrodd arnynt yn yr adroddiad perfformiad nesaf.
- 4.4 Mae'r **Gwasanaeth Cynllunio** yn gyfrifol am hwyluso a rheoli datblygiadau er budd cymunedau, yr economi a'r amgylchedd.
- 4.4.1 Nodir bod **Canran yr holl geisiadau cynllunio perthnasol wedi eu penderfynu o fewn 56 diwrnod (8 wythnos) (C4)** ar gyfer y flwyddyn hyd yma yn 74% o'i gymharu a 90.12% ar gyfer yr un cyfnod y flwyddyn diwethaf a'r cyfartaledd o 81.18% ar gyfer 2016/17.
- 4.4.2 Rwyf wedi herio y dirywiad yn y perfformiad ac wedi gofyn i'r Gwasanaeth amlygu'r rhesymau dros hynny yn y dyfodol gan roi sylw i'r materion sydd o fewn ein rheolaeth ni a sut yr ydym yn bwriadu ymateb. Mae'n bwysig nodi nad yw'r rhagolygon yn addawol ac nad ydym yn debygol o weld gwelliant yn y perfformiad yn ystod y flwyddyn. Er mwyn sicrhau nad yw'r sefyllfa yn dirywio ymhellach byddaf yn parhau i gadw golwg cyson ar y sefyllfa.
- 4.4.3 Gwelir bod perfformiad y mesur **Canran y ceisiadau cynllunio wedi eu pennu gafodd eu cymeradwyo (C5)** wedi gwella o 91.97% ar gyfer yr un cyfnod y flwyddyn diwethaf i 93.79%. Mae hefyd yn cymharu yn ffafriol gyda'r cyfartaledd ar gyfer 2016/17 o 91.53% ac mae lle i gredu fod y trefniadau newydd cyn cyflwyno cais sydd wedi eu cyflwyno wedi arwain at ansawdd uwch o geisiadau sydd yn ei dro wedi arwain at ganran uwch o geisiadau yn cael eu cymeradwyo.
- 4.4.4 Nodir fod perfformiad y mesur **Pa mor sydyn mae'r holl achosion Gorfodaeth ar gyfartaledd wedi cymryd i'w datrys (C6)** yn ymddangos fel ei fod wedi gwella gan leihau i 92 diwrnod o'i gymharu a 142 diwrnod yn yr un cyfnod yn 2016/17. Yn yr un modd gwelir fod **Canran yr achosion gorfodi a gafodd eu datrys o fewn 12 wythnos o gael eu derbyn yn ystod y flwyddyn (C7)** wedi cynyddu i 82% o'i gymharu a 72.74% yn yr un cyfnod yn 2016/17.
- 4.4.5 Fodd bynnag, fel yr wyf wedi adrodd o'r blaen nid wyf yn sicr os yw'r mesurau hyn yn cyfleu'r hyn sy'n bwysig i'r dinesydd ac mae'r Gwasanaeth yn dal i ystyried sut y gellir dangos fod ein gweithgareddau gorfodaeth wedi diogelu pobl.
- 4.5 Pwrpas **Gwasanaeth Gwarchod y Cyhoedd** yw cefnogi busnesau a gwarchod safonau iechyd cyhoeddus ac amgylcheddol a safonau masnach ar gyfer y cyhoedd a sicrhau fod gweithgareddau trwyddedig yn cael ei darparu mewn ffordd sydd yn gwarchod y cyhoedd ac yn cefnogi busnesau.
- 4.5.1 Yn y cyfnod dan sylw fe welir bod **Canran y busnesau uchel eu risg sydd wedi cael arolygiad yn unol a'r rhaglen (G2)** yn 7 o'i gymharu a 9 ar gyfer yr un cyfnod yn 2016/17. I'r dyfodol rwyf wedi gofyn i'r graff ddangos cynnydd yn erbyn y disgwyliadau yn ogystal a pherfformiad hanesyddol gan egluro beth yw'r risgiau sydd ynghlwm hefo unrhyw lithriadau.

4.5.2 Nodir bod **Canran y troseddau a gafodd eu datrys drwy ymyrraeth gan Warchod y Cyhoedd (G5)** yn 57% o'i gymharu a 34% ar gyfer yr un cyfnod yn 2016/17. Er fod hyn yn ymddangos yn welliant sylweddol rwy'n awyddus i sicrhau gwell dealltwriaeth o'r rhesymau. O ganlyniad, rwyf wedi gofyn am ddadansoddiad pellach o'r achosion sydd heb eu datrys er mwyn deall y rhesymau a'r cyfnod amser y maent wedi bod yn eistedd.

4.5.3 Dengys y wybodaeth ynghylch **Cyfartaledd y dyddiau a gymerir i benderfynu cais trwydded tacsï (G7)** fod y perfformiad yn gymharol sefydlog ar 10.24 diwrnod o'i gymharu a 11 yn 2016/17. Fodd bynnag, o edrych ar yr achosion mae'n amlwg fod rhai ceisiadau yn cymryd mwy nag y dylent ac o ganlyniad rwyf wedi gofyn am adroddiad ar ffurf graff cap i'r dyfodol er mwyn amlygu'r eithriadau a'r rhesymau dros unrhyw oedi.

## 5 SEFYLLFA ARIANNOL/ ARBEDION

5.1 Er fod rhywfaint o lithriad mae'r holl o gynlluniau arbedion 2016/17 wedi eu gwireddu erbyn hyn.

5.2 Mae cynnydd derbyniol iawn wedi ei wneud tuag at wireddu cynlluniau 2017/18 gyda 98% o'r arbedion unai wedi eu gwireddu neu ar y trywydd cywir i gyflawni'n amserol.

## 6 CAMAU NESAF AC AMSERLEN

6.1 Dim i'w nodi.

## 7 UNRHYW YMGYNGHORIADAU A GYNHALIWDYD CYN ARGYMELL Y PENDERFYNIAD

7.1 **Barn y Swyddogion Statudol:**

**i. Y Swyddog Monitro:**

Dim sylwadau o safbwynt priodoldeb

**ii. Y Pennaeth Cyllid:**

Rwyf yn fodlon fod cynnwys yr adroddiad yn adlewyrchiad teg o'r sefyllfa ariannol, gyda'r Adran Amgylchedd yn gwneud cynnydd dderbyniol iawn tuag at wireddu'r cynlluniau arbedion hynny y cyfeirir atynt yn rhan 5 yr adroddiad.

7.2 **Barn yr Aelod Lleol:**

7.2.1 Ddim yn fater lleol.

---

## Atodiadau

### Atodiad 1 – Mesurau Perfformiad